



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 8

Nimisha nem tasüba temerenshi
anogo atsülanger

Jordan Brentford-i Henderson den küm
2 atema tenangzüktepba yangluogo



VOL. XXII ISSUE NO. 271 (ADOK 271)

DIMAPUR

RASEMNÜ (WEDNESDAY)

CHITENI (JULY) 16, 2025

₹ 5.00

National Emblem timi amshitsü tuyur

New Delhi, Chiteni/July 15 (Agencies): Ministry of Home Affairs (MHA), Government of India ajanga State Governments, Union Territories aser Central Ministries ajunga dang State Emblem of India amshitsü asoshi ozüing yanglua aliba shidak amshitsü totuyuba agütsüogo.

Nüburtemi amshiba aser jurila tesem balala nung national symbols, emblems aser tenüing tem temelaba makai meshidaki amshiba indang High Court of Karnataka ajanga ajitetba sülen iba totuyuba ya agütsü.

Emblem ya Lion Capital nung aliba molusüngzü asem

noksa den iba tsünglanglen kor ka aser nashi bongchi ka aser tiyong nung Ashoka Chakra lir aser Devanagari script nung "Satyameva Jayate" ta zülua lir aser ibai Government of India indang official seal lir.

Iba ya amshitsü asoshi State Emblem of India (Prohibition of Improper Use) Act, 2005, aser the associated Rules notified in 2007 (amended in 2010) nung shia lir.

Ministry ajanga sorkar department balala dang nüburtem nem print aser digital media ajanga angatetdaksütsü aser temelaba makai mesüra meshidaki amshiba atema merenshitsü totuyuba agütsü.

GPRN/NSCN ajanga Kuki national workers ajuru



Dimapur, Chiteni/July 15 (TYO): GPRN/NSCN lenir C. Singson Kuki-i anir civil aser military wongs nungi Kuki Region workers nisung 80 dak temai Oking nung Ato Kilonser aser Convener WC, NNPGs, N. Kitovi Zhimomi aser Vice President, Chennyiem Konyak den ajurutepea liasü.

Iba mapang Nagaland nung aliba Kuki nungertem Naga political movement den pilatsü makokba tesendaktep, Nagaland nung tera yanger aliba indang nenshia ashi.

1929 nungi tanü tashi Naga political movement nung Kuki nungeri shilem agiba ya khenyongi balaka liasü, kechiaser Manipur nungi asen Naga nunger adianu tem dang kanga agi tama Kuki nungeri Naga nunger political movement nung mezüingpur den tongpu apur nokdaka liasü.

Iba senden nung Kuki Naga

National workers tem dang manen mezüingpuri inyaka yutsüba ama inyaksü, Naga national movement nung menur tetsüing ajemoker temi otsü tiazü prokshiba senzüka yutsütsü aser Naga nunger puti otsü, maitsü aser sobaliba wazüka ayutsü ayongzüka liasü.

Kuki delegation-i President Maj. (Retd.) R.M Lotha aser ato kilonser N Kitovi Zhimomi lenisüba kübok GPRN/NSCN lenirtem shidak nung nokdaker ta agizük aser Nagaland nung aliba Kuki nungeri Government of India aser Naga nunger tsüngta ajaki akumtsübotsüsa aser agizüktettsüsa political solution bener aruba pelashishia agizüktsü, ta sangdong.

Naga political aser social system nung Indigenous Kuki nunger tongti shilem agia alitsü aser maneni Nagaland kumzüka ayutsü pangjema liasü.

Tawa Undergraduate results sangdongba nung temulung masür: ANCSU

Dimapur, Chiteni/July 15 (TYO): Tawa 2nd, 4th aser 6th semester FYUGP aser CBCS results sangdongba nung All Nagaland College Students' Union (ANCSU) ajanga tebilemtsü khuret kar lemsatepogo.

Asen state nung NEP 2020 mapa kuma amshiba nung temulung melemtemi aliba mapang mark moderation procedure ya student-friendly kumdaksütsü aser tamakok ajuru ajemdaksütsü asoshi reprangshinung ajungtsü, ta ANCSU ajanga Vice Chancellor, Nagaland University dangi tezüluba ka agütsüba nung shia liasü.

Kaketshir aser college ketdangsürtem den sensaksemba aser shisa lemsatepba nungi tan academic year nung 2nd aser 4th semesters indang backlog rate

ya akhi mapang dang nungi kanga agi tali aliba ANCSU ajanga asadangtet. Iba tensa yagi asen institutions aser university tenüing tamajung agiba kisüing masü saka kaketshir meyirijang aika tarutsü tia timtem nung yutsür, ta ashi.

University ajanga NEP 2020 amshiba nung tasüingdangtsü balala lir, kechiaser kaketshir tenüing maliba, VAC subject pass sür sernung NU results nung backlog ta sayuba aser 2nd semester nung kaketshir subjects kar nung pass süogo ta sangdongaka backlog ta shia aliba amala kulitem densema lir, ta ANCSU ajanga ashi.

Item tebilemtsü tongtipang tem nung ajemdaker Nagaland University dang re-evaluation fee yanglushitsü aser re-evaluation examination

metenzükdang kaketshir nem pei indang answer scripts jangjadaksütsü ajungshir, ta ashi.

Tawa sangdongba results nung pass rate kanga ajemba, kaketshir mulung nung anisüngzümelidaksüba, higher studies aotsü majungshiba kisüing masü saka tekolok techira kaketshir karbo kanga maksüogo, shirnok toppers list nung liaka ketdangsür temi mapa senzüka yutsüba aser temulung agüja meinyakba ajanga marks update nung menuba ajanga results melenshir ta shia lir.

Anungji Nagaland University ajanga item tensa kanga junga asadanga ajak asoshi teyari agütsüba educational environment adokdaksütsü asoshi inyaker ta sayudaksünner, ta ANCSU ajangasa ashi.

Kaladam project yagi NE melenshitsü: Union Minister Sonowal

Visakhapatnam, Chiteni/July 15 (Agencies): Linük tanüingba nungi Northeast meta tajemba kumdaksütsü nükjidong nung India aser Myanmar tsüngta tenzüka Kaladam project ya 2027 tashinung renemer amshia alitsü, ta Union Minister Sarbananda Sonowal-i Hombarnü ashi.

Dangar linük agi müketbanger aliba Northeast region ya "landlinked" region kümdaksütsü asoshi Kaladan project ya tongtipang mera ka lir. Iba yagi global shipping routes amshitsü maongka tasen agütsür, logistical costs tajemba

kumdaksütsü aser local industries, agriculture aser handicrafts atema markets lapoktsür.

Ibai amshi tenzükerbo Northeastern states atema transit mapang aser trade costs kanga ajemtsü, rongsenketzüing maongka tali akumtsü aser arütsü alema shishilempaba nung region ya asayar tongti akumtsü, ta Sonowal-i ashi.

"Myanmar nung Sittwe rongnendak renema lir. Tang Aizawl den sendakteptsü asoshi lenmang yangluba mapang lir. Kaladan Multimodal Transit Transport

Project ajunga 2027 tashinung amshitsü," ta pai ashi.

Tesendaktep aser trade routes tajungba akumba nungi Mizoram, Tripura aser Assam ama states tem ajangzüktsü aser 'enhanced integration' ajanga Meghalaya, Arunachal Pradesh aser Nagaland ajangzüktsü.

"Rongnendak, trade corridors aser value chains sendaktepba ajanga Kaladan project ya asen kidanger den tali lungjemshitsü aser Northeast ya global marketplace anasai bener arutsü," ta Sonowal-isa ashi.

UIDAI ajanga tanur indang biometrics update asütsü ayongzüker

New Delhi, Chiteni/July 15 (Agencies): Tanur arishi küm tenet junger saka Aadhaar nung pei biometrics update masü alirtem dang Mandatory Biometric Update (MBU) renema inyaksü tongtipang lir, ta Unique Identification Authority of India (UIDAI) ajanga nenshia metetdaksü.

Ibai Aadhaar kübok tang tamshidak yimya lir, aser tsürabor mesüra kinunger temi pei tanur indang details ya Aadhaar Seva Kendra mesüra designated Aadhaar centre mashi nung oa update sütettsü.

Arishi küm 5 aser 7 tsüngta tanur indang Aadhaar Biometrics ya angati update asütsü, ta sangdong ajanga ashi.

Arishi küm pongu tekübok tanur ka Aadhaar atema noksa, tenüing, tasoba anogo, gender, address aser documents of proof agüja zülüoker. Arishi küm pongu tekübok tanurtem Aadhaar enrolment mapang tanur indang fingerprints aser iris biometrics magir.

Aser tanur arishi küm pongu ajungdang pa mesüra la indang Aadhaar update asüdüang fingerprints, iris aser

noksa tem kechi südir süaka nüngdaker. Iba dang Mandatory Biometric Update (MBU) ta ajar. Tanur ya arishi küm pongu aser tenet tsüngta MBU ya inyakra, angati asütsü. Saka arishi küm tenet sülen sen 100 meshitsü.

Tanur indang biometric data shidak anepalua ayutsü asoshi mapang shidak nung MBU renema ayutsü ya tongtipang lir. Arish küm tenet ajungba sülena MBU ya merenemra, Aadhaar number ya deactivate asütsü, ta UIDAI sangdong ajangasa ashi.

SANGDONGER

Dimapur Senden Riju Complex Masterplan yanglutsü atema, Aotsür-Aoer Architects aser Architectural Firm alir tejangrartemi teküboklen agüja aliba number nung tongteprateptsü asoshi sangdonger. - **9862477792 / 9436013628**

Sd/-
Senden Riju Monetization Committee
(ASTD)

Springshed Management training tenzükogo



Dimapur, Chiteni/July 15 (TYO): 'Springshed Management' dak sendakba nung anogo asem training ka July 15 nü tenzükogo aser 17 nü tembangtsü.

Iba training sentong ya Water Resources Department, Nagaland aser Central Ground Water Board, North Eastern Region, Guwahati Ministry of Jal Shakti, Government of India na longjemer Water Resources Department, Chief Engineer Office Conference Hall nung ayongzüka agidar.

Training lapokba sentong nung o jembiba mapang Additional Chief Engineer, Water Resources Department, Er. Sobu Angami-i, North aser North-east India nung aliba state tem shirnok dang Himalayan state tem ta ajar, item state tem ya kidang amshitsü, kiset shiruru aser aluyimtsü atema tzü ya tzüpokdak balala aser glaciers dak metaloker alir, ta ashi.

Paisa, asen state nunga tzü ya timba spring sources balala

nungi agir aser item tzüpokdak nungi tenzükba ayongtem nung ayimba tzü ya alu nung amshir, ajisüaka kumtem tsünga tzü tali amshiba, nütsünyongsük tali kuma aoba, ali amshiba, tzümpung melenshiba, sentong tapet meyanglui terenlok maparen balala benoka inyakba aser tanga ken o tem aika ajanga item tzüpokdaktem ya tajemba kuma odor, ta ashi.

Springshed Management ya koda tongtimbang iba indang jembiba mapang Er. Sobu Angami-i, tzüpokdak asüngsashitsü nungdakba lemsatepba den, iba ya sorkar policy level aser field implementation level nung takaratiba nung benoka inyaksü nungdakba lemsatep.

Paisa, sorkari tang tzüpokdaktem kodang tongtimbang iba dak rangloker inyakdar aser spring census, irrigation census aser water bodies census agidar, ta ashi. North-eastern state tem nung Brahmaputra Board-i Springshed Management

schemes aika benoka inyakba mapang ka nung pai ashiba agi, Water Resources Department-i Springshed Management programme benoka inyaksü atema jenjang agidar, kechiyong iba ya department-i telongjunga benoka minyakba mapa ka lir. Paisa, iba sentong ya technical subject ka küboki aiter ta ashi.

Anungji pai training nung shilem agirtem dang kechi jenjang agi nung ajungtsü aji kanga junga bushisüngdangtsü aser anogo asem training agiba mapang shisalen sayurtem nungi shisatsü agitsü ajungshi, ajita asü nungdang district ajak nung Springshed Management Project tem benoka inyaktetsü, ta ashi.

Anogo asem training atema shisalen sayurji Shasinlo Kent, Anenuo Pienyu aser Mophi Mili nung asütsü, shirnoki spring studies aser springshed management onüktem nung tangazükba agütsütsü aser sensaksem balala ayongzüka agiba den tesem balala semdangtsü.

School Education-i tetuyuba agütsü

Dimapur, Chiteni/July 15 (TYO): Tekübokba jenjang nung aliba tanurtem temeden kümzüka toktsüts üatema Directorate of School Education, Government of Nagaland-i, meshimetsüa aliba tanurtem jangjateta item tanurtem ya sorkar school tem nung züngoksemtsütsü tetuyuba agütsüogo.

Sensak tia nung aliba aser kaket shitsü maka aliba tanur, tetsür aser differently-abled pesrson tem shirnok meshimtsürtem lir parnok kümzüka ayutsü aser rehabilitation atema National Human Rights Commission (NHRC)-i tetuyuba agütsüba dak ajemdaker iba jenjang ya agiogo.

Tetuyuba nungsa, NGOs Municipal/town/village council, Arogo, kaketsür lokti tentettem aser nüburtem dang iba amala tanurtem indang osang tejangja Child Helpline 1098 ajanga metetdaksütsü ayongzüko, ajita asünungdang item tanurtem ya parnok anasatiba

aliba school tem nung züngoksemtetsü.

School Education Department-i, tanur arishi küm 6 nungi 14 tsünga alir shirnok school toktsüogo, mesüra khen danga odanga mali aser iba den tanur shirnok kangshia meshimetsüdaksür parnok den ano arishi küm 3 nungi 6 tsünga alir shirnok tsürapurtem meshimetsürettem lir, aser parnok pre-school, Anganwadi, mesüra Balvatika center tem nung züngoksema mali item ya jangjatsü meranger.

Ken o dak sendakba nung Zunheboto district kübok District Education Officers (DEOs), Sub-Divisional Education Officers (SDEOs), aser Senior SDEO tem ajak dang Right to Education Act, 2009 kübok provision tem dak ajemdaker District Child Protection Units aser Child Welfare Committees den tongtepratepa item tanurtem ya admission agitsütsü asoshi jenjang agitsü tetuyuba agütsüogo.

Chumou nung BLO tem training agi

Dimapur, Chiteni/July 15 (TYO): Chief Electoral Officer, Nagaland tetuyuba dak ajemdaker aser tang capacity-building atema jenjang agia aliba nung shilem ka ama 4 Ghaspani -I & 5 Ghaspani -II kübok BLO tem training ka Chumoukedima, Deputy Commissioner office Conference Hall nung agiogo.

Chumoukedima DC Polan John, NCS-i o tatsüka jembiba mapang ashiba agi, Election Commission of India (ECI) tetuyuba nung election tem agitsü aser electoral roll renemtsü asoshi intensive summary revision ya kanga tongtimbang lir.

Paisa, ajaki clean election inyakyim indang jembir saka iba amala intensive summary revision ajanga dang e-rolls temerek aser tejangja renemtetsü, ta ashi. Maneni DC-i, BLOs, ERO, Supervisor, AERO tem dang parnok nem nongloksüba mapa süoki ia agitsü, kechiyong parnok ya election dak sendakba nung election commission of India dangi deputation nung yokogo, ta ashi.

Pai, ECI-i inyakyim tasen kar benokogo aser iba atema Ghaspani I aser Ghaspani-II nungi BLO ana shimer Delhi-i training atema yokogo, ta ashi. DC-i, BLO ajak dang kanga nendaka angazüksü mepeshi, kechiyong iba training nung angazükbatem yagi parnok pei talidaki oa mapa tenzükba mapang teyari agütsütsü ta ashi. Pai, kibongshi-i tua voter tem indang osang tejangja bendentsü aser temsüa aliba voter tem züngoksemtsü ayongzüka liasü.

Sentong nungsa ADC & ERO, Chumoukedima, Kuzonyi Wideo-i o jembiba mapang BLO tem ajak pelashishia agizük aser ashiba agi, ECI

nungi agizükba brochure nung form aser app tem nung temelenshi aika aliba nguogo aser item indang training mapang tangazükba agütsütsü. Paisa, BLO temi polling station bifurcation indang ken o ka benokogo, saka ECI aser CEO office nungi tetuyuba dak ajemdaker bifurcation atema polling station kar dang shimtsü, kong voter 1200 dak tema lir, ta ashi.

Paisa, RO components atema nisung ka 2 km radius nungi pilar lira parnok polling station ji balaka asütsüla, saka ECI nungi tang tashi osang agizüka mali. Iba dak sendakba nung tetuyuba agizükra parnok inyakteptsü merangtsü, ta shisem.

Maneni Wideo-i ashiba agi, Capacity building training tembangba sülen ki shiai tua ken o jangjashiba aser pre revision inyakyimtem benoka inyaksü. Anungji pai BLO ajak dang training nung tesayubatem kanga junga angazüksü aser form aser application nung temelenshitem temulungdang ayutsü mepeshia liasü.

4 Ghaspani-I and 5 Ghaspani-II kübok Booth Level Officers ajak, AERO Medzhiphema, Niuland, aser Chumoukedima nungeri iba senden nung shilem agia liasü.

Senden nung Constitutional provisions, Statutory provisions, aser BLO tem shimba; Special Intensive Revision (SIR) nung BLO tem tinyaktsü; Booth Awareness Group (BAG), Nazari Map; telok tentetba & Role play, form tem lemtsüba aser house-to-house Enumeration indang onük densema liasü. Training session nung onüktem ya Ketoulhounuo Thakro aser Nikavi Chishi nati benoka liasü.

Naga American Foundation Conference agiogo



Dimapur, Chiteni/July 15 (TYO): Küm ana nung khen agiba Naga American Foundation (NAF) conference July 11, 12 aser 13 nü Westworth Village/Fort Worth, Texas nung agiogo. Anogo asem tsünga iba sentong nung nisung 200 shi-i shilem agia liasü. Taküm iba conference indang omenji "Bridging Cultures: Weaving Naga Traditions into the Modern World," liasü aser First Naga Baptist Church, Texas-i ayongzüka agi.

Setong nung o jembir Seyie Design CEO aser Creative Director Seyie Putsure-i, la Kohima nung intetba indang aser koda la kaketsür ka ama United States-i arua fashion aser interior design wadang nung ajemok iba indang lemsatep. Laisa, liyonga aruba mapang takok aser tamakoktem indang lemsatep aser Tsüngrem dak tamang

ayuba ajanga la len aniba indang lemsatepa liasü.

Kasa mapang nung Wungram Shishak-ia, pa dak T-Cell Acute Lymphoblastic Leukemia tashi adongba aser pa asoshi tenünga transplant asütsüba dak alaka tanga lenmang kecha makai aküm, iba indang lemsatep. Wungram indang cousin Zing Shishak shibai tenünga tenla agüja liasü, paia tetendangba balala agiba aser tenla agütsüba indang lemsatep. Medical tsütsü inyakyimtem ajak takok ngua inyakogo aser Wungram aser Zing na ajanga temeim tashi, tamang aser Tsüngrem taochi agi aneptsüba indang tali jangja metetdaksür.

Kasa mapang nung mental health professionals panel kati mental health dak sendakba nung mesenmetu inyakyimtem sendaka aliba, peisasa anepaluba, mongintem teyari

agiba aser Arogo aser tanga lokti tentettemi teyari agütsütsü kodang tongtimbang lir iba indang sensaksema liasü.

Multicultural aser multigenerational panel kati, Naga nung lanurtemi Naga nung maittsü dak sendakba nung parnok tebilemba lemsatepba indang video ka repringba sülen Naga nung sobaliba indang sensaksema liasü. RRaD nungi Dolly Kikon aser Akum Longchari nati iba video ya bendena liasü.

Sentong nungsa bazaar ka, Naga nung chiyongtsü balala aser sobaliba aser sempet sayaba sentong agia liasü. Deobarnü tatembangbuba sentong agiba mapang Dr. Ren Merry-i, Naga nungertem dang temulung ajunga agi Tsüngrem meimtsü aser anogoshishia libaliro aser sensaksem mapang Khrista osang tajung lemsateptsü ajungshia liasü.

Nimisha nem tasüba temerenshi anogo atsülanger



New Delhi, July 15 (Agencies): July 16 nü Yemen linük nung Kerala tsür nurse, Nimisha Priya nem tasüba temerenshi agütsüsü liasü, ajisüaka anogo atsülangogo.

India sorkar aser yimsü lenirtemi tiyongtsü ia Yemen ketdangsertem den jembiba ajanga tasüba temerenshi agütsüsü anogo ka dang lia ano mapang atsülangogo.

Nimisha Priya ya tang Yemen nung aliba jail ka nung puoka lir. 2017 küm la indang business partner, Talal Abdo Mehdi tepsetba ken o nung la aija liasü aser 2023 küm November ita nung Yemen nung Supreme Judicial Council-i la nem tasüba temerenshi obendang agütsü.

Osang angazükba agi, Kerala nung Grand Mufti, Kanthapuram A.P. Aboobacker

Musliyar-ia par mendemer ka aser Yemen nung Shoora Council züngsem ka dang la taküm kümzüksü atema tiyongtsü ia inyakdaksüner, ta mepishia liasü.

Ano Kerala Angh, Rajendra V. Arlekar-ia Ministry of External Affairs dang la taküm kümzüksü atema tang rongdak süa inyakdaksüner ta mepishia liasü.

Kerala nung billionaire, M.A. Yusuf Ali-ia Nimisha taküm alangzüksü atema pai senotsü tenla agütsüsü melunga lir, ta metetdaksüogo.

Nimisha Priya tetsü, Prema Kumari bo Sanaa, Yemen tashi oa asür, Talal Abdo Mehdi'er kibong züngsemtem-a ajurua la dang tai atoktsü mepishiogo.

Hombarnü Supreme Court nung ken o angadangba mapang nung Attorney General-i court

dang, Nimisha taküm kümzüksü atema India sorkari akokba tashi meranga inyakdar, ta metetdaksü.

2008 küm Nimisha Priya-ia mapa bushia Yemen-i oa liasü. La mezüng Yemen yimtiba, Sanaa nung aliba sorkar hospital ka nung nurse inyaka liasü aser la meyong nija clinic ka lapoktsü atema 2014 küm mapaji toktsü.

Yemen linük ozüng kübok business inyaktsü atema bendangertemi Yemen nung business partner ka nüngdaker, anungji lai Talal Abdo Mahdi den partnership yanglua liasü. 2015 küm tetenzüklen lai yipten 14 aliba Al Aman Medical Clinic lapok.

Ajisüaka Nimisha aser la indang business partner, Mehdi na tsüngda mangatetep adoka pai la kanga amokmerena liasü. Pai la indang passport aser documents-a rakzüka ayu. 2016 küm lai police danga teyari meshi saka police-i kecha meinyak.

Tesüsa 2017 küm lai Talal Abdo Mehdi ket nungi la meyong passport agütsü atema pa amoi odaktsüsü asoshi pa nem amoi aoba mozü agüja liasü, ajisüaka mozüji kanga tesashi asüba agi Mehdi süadok. Iba tatalokba sülen lai jena aotsü merangba mapang nung la apu aser 2018 küm court-i nisung tepsetba ken o nung la aija liasü.

Air India 171 report ajanga telangzüba magütsür: IFALPA

New Delhi, Chiteni/July 15 (Agencies): Taküm June 12 anogo nung Ahmedabad nung Air India AI 171 tayimtsü tsükokba report mezüngbuba shilem sangdongba sülen anogo ishika lir International Federation of Air Line Pilots' Associations (IFALPA)-i sangdong ka ajanga, iba report ajanga telangzüba magütsür, saka tasüngdangbatem ang teimba akümer, ta ashi.

India nung Aircraft

Accident Investigation Bureau (AAIB)-i iba report yimjak nung mesadangdongdang yongi western media-ibo iba report ghonda 44 jelia ngur liasü.

IFALPA-i, " Bushisüngdangba mezüngbuba shilem report ajanga tasüngdangba aika akümer, aser telangzüba magütsür. Iba report nung alibatem ratetbaji pei tebilemba jembiba dang asütsü, aser iba jagi bushisüngdangba maparen nung teyari magütsür," ta

metetdaksü.

"Air India 171 tayimtsü lendong nung asürtem aser parnok kibongtemi, iba tatalokba bushisüngdangba sülen osang tejangja angutsü temsüa lir," ta parnokisa metetdaksü.

Taoba Honibarnü mezüngbuba report sangdongba sülen karibo, iba ya pilot temi peisasa asütsü atema inyakba lir ta jembiba otem India Commercial Pilots' Association (ICPA)-ia aija liasü.



New Delhi, July 15, 2025: Tzüngluruwa mongpu Parliament tenzüksü mapang ana nung lia Mongolbarnü New Delhi nung linük tatong Tir aser Rajya Sabha Chairman, Jagdeep Dhankhar-i (ajichi) Congress Party Tir, Mallikarjun Kharge ajurua senden amendang tangokba noksa nung angur.

Obala den Tasoba anogo

TEPELA LEMSATEPER



Wb. P. Yanglu Ao (Akhoya)

Temeim Oba,

Tsüngrem taochi tulu agi nü nem alima temoatsü tabensa aser arishi talang agütsüogo. Iba temoatsü manung tanü July 16 nü na arishi küm 80 ajungdang onok ajaki ne den na asoba anogo tepela tulu lemsateper. Tsüngremi ano maneni nü taküm timtem ajak nungi kümzüka yujangma aser nü nem anema aliba temoatsü aser arishi talang moajangma ta onoki sarasademtsür.

-Temeim Kinungtsü, Chirnur, Semchirtem aser Kinungertem.



ANM, SCHOOL OF NURSING

IMPUR CHRISTIAN HOSPITAL

Impur: 798615, Mokokchung, Nagaland


Ref No. ICH/SON - 1/GC/21 - 21

Dated:14th July 2025

ADVERTISEMENT

Applicants are hereby invited to undergo 2 (Two) years Course in ANM(Auxiliary Nurse Midwife) training for the academic session 2025-2026 at ANM, School of Nursing, Impur Christian Hospital, Mokokchung (recognized by INC).

1. Candidate should be PU (10+2) from any stream with 40% from recognized English medium school Board and 45% from Recognized national Institute of Open school.
2. Candidate should be Unmarried.
3. Eligible Age : 17yrs to 25 years as on 30th August 2025.
4. Number of seats : 30
5. Forms for interview will be available at Impur Christian Hospital, Impur Diagnostic centre Mokokchung, for download at www.abamimpur.org in the download section or **SCAN THE QR CODE** given, for the form.
6. Last date of form submission is **12th September 2025.**
7. Session will start from 1st October 2025.
8. Written and oral interview dates will be notified later.
9. For query contact 7085254374. (Ms. Yasanaro - Nursing Tutor).



**Sd/
Medical Superintendent
Impur Christian Hospital**

CPI lenir Chandu Rathod khaset

Hyderabad, July 15 (Agencies): Mongolbar anepdang Communist Party of India (CPI) lenir aser CPI Hyderabad city committee nung züngsem, Chandu Rathod Hyderabad nung aliba Shalivahana Nagar Park nung jajazü senzüba mapang nung mejangjaba nisung kari pa khasetogo, ta police-i metetdaksü.

Malakpet police-i ashiba agi, anepdang 7:30 ako meta nisung asem-pezü shi gari ka nung aruba sülen Rathod dak injang aika khaloktsü aser iba tesem nungjisa pa süadok. Rathod denji pa kinungtsü aser par jabaso nata liasü.

Iba tatalokba sülen police team ka den forensic unit ka iba tesem jagi oa bushisüngdang tenzükogo aser aibelenertem maittsü jangjatsü atema kiyong nung aliba CCTV footage bendendar, ta police-i metetdaksü.

Iba tesem nungjagi police-i injang terep asem den injang ana angu.

2022 küm Rathod anema LB Nagar Police Station nung nisung tepsetba ken o ka benoka lir.

Rathod kinungtsü police dang, Rathod aser CPI (ML) züngsem, Rajesh na tsükchitepa lir, anungji lai Rajesh dak melung malemer, ta metetdaksü.



TIR YIMYIM YIMOBILEM (EDITORIAL)

DIMAPUR

RASEMNÜ

CHITENI 16, 2025

Ochi ya tongtibatiba subject asütsüla

Nisung tajung, teindang aser ochishir akümtsü sayuba tesem ana lir, kaji tenla ki aser tangabaji kaketreju, anungji tesem anapronglaji temeshi tekülemdak kanga tongtibatiba tesem lir. Ajisüaka, tenla kidang sayutsüngirtemi tiyazü jembira aser ochimashi mapa inyakra nübortemji koda asütsü ? Aji oda, tanü asen lima nungbo University tashi nung tesayurtemi University nung amshitsü asoshi osettsüset agütsürtem, supplier, dang dena sübokrem meshiba osangji taoksatsüka aser taaksüka lir. Univeristy-ji nisungchi kümdaktsütsü asoshi shisalen tajung sayudak tesem ka lir, anungji tenla kidanga tongtibatiba. Ajisüaka, yangji ochimashi aser sübokrem agiba mapatemang subject tongtibatiba ka agir ama inyaka sayura, iba University nung jagi züngteteritemi kechi koma nisung ka asütsü ? Iba tesayur jagi University dang masü saka Nagaland tenüng menüksüogo. Kasaji, asen lima nung nisung tajung kümdaktsütsü asoshi shisalen tajung sayutsü atema School Education, Higher Education aser Technical Education ta nisungtem tamajung kümdi asüyonga mekümtetsüsa tulus, tashitemeteter aser tesayurtem agi sünga department-tem lir. Ajisüaka, item department nung inyaktertemiang nübortem dang ochimashilen aser peisasa pei mazüoktetba sobaliba tamajung sayura, taintembo inadokerji ojang, saka tanurtem aser lanurtem agi kechi küma aotsü ? Tanü asüngbo government mapa nung inyaktertem ita sen tajung angur aser ano Univeristy nung tesayurtemsa tajungba aser teimba ngua alitsü. Ajisüaka, pei ita sen agi tenük masüng auyatsü aser sübokrem meshia agitsü bilemba shisatsüji nisung tajung kümdaktsütsü asoshi bilemba shisatsü masü, iba jagi tarutsü lima raksatsüogo. Joko shisaliok sayudak aser angazükdak, temeshi sabangtem menenadokerji koda asütsü, asenoksasa asenok khi meshitetsüla aser asenoksasa asenok azüoka alitsü mulungtettsüla. Atangji, University-ji tesayurtemi kaketsirtem dang senso tajung küma nübortem asoshi teyarir tajung akümtsü len sayudak tesem lir. Ajisüaka, tesayurtemi kaketsirtem nung alibattem koma sayur ta asübaji tongtibatiba masü saka parnoki kaketsirtem tsüngdang koma lia sayur ta asübjang tongtibatiba lir. Tanü putu nungbo school-i maodangyongi zülutsü aser azüngtsü dang masü saka tangar oshi jembitsü dena tanurtemi shia adoker, anungji tangari kaketsirtem nung zülua toktsüba yabo teayurtemi mesayuyonga peisasa angazüktetsü. Anungji, tanü putu nungbo tesayur ka mapaji kaketsirtem nung zülua alibattem junga sayur asü mesayur ta asübaji masü, saka tesayurtemi libaliro nung junga lia sayur asü mesayur ta asübjang tongtibatiba akümer. Kasaji, government mapa inyaktertema, koba department aser koba mapa inyakdir inyakaka, nübortem tajung kümdaktsütsü asoshi ita sen tajung chia inyaker, anungji ita sen agi tenük masüng, nübortem yaritsü melena nübortem indang shilemang agitsütsü bilemra, government mapaji meinyakang ajak atema tajangzük asütsü. Government aser University nung mapa inyaktertem nem ita sen agütsüba ya nübortem saru agütsüba nungi agütsür, aji arogo nung tamangertem tenla agütsüba nungi tenzükertem nem ita sen agütsüba amai lir. Anungji, nübortem saru agütsüba nungi ita sen chia nübortem külakoktsütsü mebilemtsüla. Kasaji, tanur tajung kümdaktsütsü asoshi ita sen tajung agia tesayur mapa inyaker ta temulungsüsüa bilema tanurtem dang Maths aser Science masü, saka ochi lenmang sayutsübaji, tesayur ka asoshi, tongtibatiba subject asütsüla.

OLEMSABANG

Mass Media - Tetsürtem asoshi tajangzük asü takoksa?

Longchanaro Longchar

Noksa nung anguba aser asangsang nung anguba tetsüngta tulu lir aser ibaji bendangtsü atema asenok shisatsü nüngdaker. Tanü alima kangadang karaa ainba lima ka nung asenok alir ta bangbet süa jembiba asenoki meteta lir. Saka alima ainba den liromedema asen shisatsüjia ainer asü masü?

Tanü putu nung joko TV aser telephone ajanga dang masü saka internet, cable/satellite TV aser mobile phone ajanga osangtsüsang agiteper, noksa lemsateper aser nüngdakba tongtepratep ajak inyaker. Item amala "information technology" ya asenoki noktangtsü mesüra soita ayutsü makok aser technology-ji tajungba, tuluba, tekaraba aser tesashiba tang akümtsü. Iba ama alima meyipshishidaktsütsü tashi aketba technology putu ka nung alidang asenok shisatsü aser tangatetba koba jenjang ka nung lir?

Asenoki metet, "information technology" ajanga "mass media" ya tesüngmangtsü ka melenshidaktsüogo. Mass media nung asenoki tajung tamajung ajak angutsü saka asenok dak tajung aser tamajung bendangtettsü shisatsü alitsü tim. Tia kar maka, anogoshia aben asenok liyonga aodang item mass media ya joko asenok taküm nung shilem ka aser asen temang nung tenüktelen ka ama kümadokogo. Ibayongji yimya sübaba ka ama asenoki joko mass media ajanga bener arutsüba tajangzük aser takoksa asadangtsü mebilemer.

Mass media tashi amshia shishilembartem nübur mesüzüksü tasa jenti amshir. Terebrangertem puadaktsütsü aser parnok ket nungi sen mesütsü nükjidong nung shishilembartem noksa tapu balala yanglua sayur. Noksa nung aiben tetsür tobur tajung süoshi junga masem sayuba asenoki angur. Ano TV, osangkaket aser magazine ajak nung tetsürtem mangsa ama sayuba asenoki angur. Item aiürtem ya asangsang nungbo tobur kanga tajungbo masü saka parnok noksa ya computer nung yanglushir (digitally manipulated) sayuba lir. Saka tetsür aikati item noksa nung adokba aiürtem ama renemtsü merangba asenoki angur. Ya kangadang tekümdangtsü ka lir kechiyong yamala mesükba ajanga tetsür ka tekolok shisatsü menentsür, loktiliba masüngteti kümdaktsür aser rongsenkettsüngba nung tabok badaktsür.

Küm 2007 nung American Physiological Association (APA) ajanga tebushidangba ka inyakba sülen tansütsü osang ka sangdonga lir. Mass media nung adokba tetsür noksa rebrangba ajanga tetsürchanutem shisatsü aser temang (emotional and physical health) raksatsür ta APA-i ngutetogo. Parnokisa ashiba agi, teintet tetsürtem dang nungi tetsürchanutem asoshi iba lendong ya anasaba lir.

Ano nungtugu kentenertem ken atenba nung ojang tamajung inoka atenba aser ken noksa (music video) nung nüktabangta noksa ama azüabonga sayuba ajanga lanurtem tekolok shisatsü koda raksaja alitsü! Ano tanüasüng lanurtemi Korea nungeri yangluba noksa nung sayuba jilo koda sapua ayir, asenok ajaki meteta lir. Korea nunger ya mapa kangadang meranga inyakba kin ka lir aser noksa nung sayuba ama parnoki asangsang nung malir. Noksa nung sayuba ya parnok shishilembatsü tasa ka dang lir saka tia maka asen lanurtemi parnok asangsang nung libaliroba masü saka noksa nung sayuba dang jilo ayir. Noksa nung Korea nungeri renemba jilo ayitsü melenbo asangsang nung Korea nungeri mapa meranga inyakba ama inyaktsü angazükung koda jungla!

Mass media ajanga sayuba noksa kobasa tagitsü, kobabo tamagitsü, kobasa tajung aser kobabo tamajung - iba tetsüngta meteta shimdangtsü asoshi asen nübur dak shisatsü agi anünga aliba tulu ka rebrangteter. Iba tashidak ya lanurtemdak tang atemer masü saka tsüraburtema jenbua mali. Pei abuani toktsür tangar den nüktabangtaba, tangar nüngsenbangsena jembiba, balaluyaba, kibong nung tesünep maliba, chirnur mazüoktetba, mapang mamshiba, azümesen, Chidiyungdi, bangdak kübok melitetba aser yamala yimya tamajung jenti tsüraburtemi mass media ajanga memeteti angazüker memeteti benshiadoker atar.

Tetsürtem, talisa tantsürtem aser chidentsürtemi Hindi serial kanga sapua rebrangtepba asenoki meteta lir. Ki mapa rebranga inyaktsü melena Hindi serial rebranga kazüba, nüngdak jembitsü melena Hindi serial otsü longa kazüba, oda office tashi nung Hindi serial otsü tatongi atonga kazüba - ya atangji ataloker! Hindi serial nung sayuba yimya timba ka Hindu nunger sobaliba aser Hindu tamangba yimsü nung ajemdaker sayur. Parnok sobaliba aser tamangbaji asenok den mabet ta meteta lidi. Sütoksünema rebrangba ka dang mesüra 'entertainment' ka dang ta bilemer rebranga alitsü akok, saka parnoki tenük agi rebrangba noksaji parnok tekolok shisatsü nung memeteti züngzünga rema yuadoker atar aser parnok asangsang libalirodang noksa nung anguba yimyato memeteti benshir.

Mass media onük ya kanga dang tulu lir aser iba ocet kija agi teperi masü saka tongmelang agi tangatetsü kar lemsatepogo. Iba ocet nung lemsatepa aliba tatishitsütem ya asen tendak tabel tesa lir. Information technology ya manenidang renloka aotsü aser mass media-jia tatem maka renloka aotsü. Alima yamaji aindang asenoka shisatsü arener asü mesüra menener, asen ajangzüker asü akoksar, ibaji kanga dang shisadangtsü mapang tongogo.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**



Nüngtugu pastor aser tesayur, John MacArthur süogo



Pastor John MacArthur

July 15, 2025: California nungi nüngtugu pastor aser kaketzülur, John MacArthur alima nungi pilaogo; pa arrshi küm 86 liasü. Hombar aonung MacArthur indang Grace to You ministry-i X ajanga, MacArthur 'pneumonia' agi shiranga hospital-i anir aoba sülen mapang tatsüka tsüngda süogo, ta metetdaksü.

"Onok melung raksar, ajisüaka pelar, kechiyong onoki meima aliba pastor aser tesayur John MacArthur Kibuba dangi ogo. Tanü nikongdang pa tanela teti tesünepdaki ogo," ta Grace to You ministry-i social media ajanga metetdaksü.

MacArthur-i pa kinüngtsü Patricia den chirnur pezü, semchir 15 aser tanaben semchir 9 yutsür pilaogo.

Iba osang angashia Laishir aser kaketzülur Owen Strachan-i, "Tanela tsütsü molusongzü, tesünep nung anisüngzükang. Par kibong, par Arogo aser pa atema mangyimertem asoshi sarasademjang," ta mepishia metetdaksü.

John Fullerton MacArthur Jr. ya 1939 küm June 19 nü Los Angeles, California nung aso. Pa taoba mapang Los Angeles Pacific College (tangbo Azusa Pacific University) nung Bachelor of Science degree angu aser Biola University's Talbot Theological Seminary nung Master of Divinity degree angu.

Pa graduate asüba sülen küm asem lir 1969 küm nungi tenzüka pa Grace Community Church of Sun Valley, California nung pastor aser tesayur küm 50 dak tali inyak.

"John lenisüba nung Grace Community Church Tenla kidang anepdang shia tekülem sentong ana nung nisung 3,000 dak tali adener," ta Master's Seminary-i metetdaksü.

"Pa lenisüba nung hopta shia züngsem meyrjang aika fellowship groups lemsar tekülem sentong agiba den training programs agi. Arogo

nung lenirtemi pei aliba tesem, linük nung alima tesem balala nung Tsüngrem tenzüksü atema züngsemtem nem training agütsür," ta Seminary-isa metetdaksü.

John MacArthur-i pa akümüli mapang nung 3,300 ben dak tali sayutsüngiogo aser Khristan kaket aser biblical study guides kaket 400 dak tali züluogo.

MacArthur-isa mapang talangka Bibles studies indang radio program aser local television broadcast ketdangsüa liasü.

MacArthur-i yarisema 1986 küm Master's University & Seminary tenzüka liasü aser 2018 küm tashi iba Seminary nung pa Tir inyaka liasü.

2020 küm coronavirus wara prokba nokdangtsü atema California nung 'lockdown' ozüng tesashi benoka Tenla kitem shibangdaksüba mapang nung MacArthur-ia tashi angaa par Arogo Tenla ki shibanga liasü, ajisüaka ita aika 'lockdown' aliba ajanga pai asentenshir Tenla kidang tamangertem adenshia tekülem sentong agi tenzüka liasü.

Ibaji ajanga MacArthur aser pai aniba Grace Community Church-i Los Angeles aser California state ketdangsertem tsüngda ken o tulu adoka liasü.

Iba mangatettep ken o adoka aliba interview ka nung jembidang pastor MacArthur-i, "Onok ya iba loktiliba atema medemertem lir. Tesüiba mapangtem nung sorkari kodanga Kibuba Yisu Khrista litsü aden-a aita tekülem magitsü aser ken matentsü atema tetuyuba magütsü," ta metetdakja liasü.

2021 küm August ita nung tesüsa state aser local ketdangsertemi MacArthur den ken o tembanga sorkari legal fees dollar sen 800,000 agüja iba ken o tembang.

Iba mapang nungji MacArthur atema ken o jembitsür Thomas Moore Society-i sangdong ka ajanga, "Yimsü temeden kümzüksü

atema tongbang talangka raraa aruogo, aser tang iba ken o tembangba ya ajanga Arogoji nüngdak, ta nokdaksü atema California nung alirtem aser America nunger ajak ajungmesotsü imlar," ta metetdakja liasü.

2023 küm Küm Tasen anogo (Amognü) nung pa arrshi küm 83 alidang shiranga hospital-i anir ao aser azü jajaba tezü danga aliba atema treatment agia liasü.

Grace Community Church-ibo MacArthur temang tajungba lir, ta sangdonga aru ajisüaka pa temang nung maneni timtem adoka yaküm July ita nungi November ita tashi pai Tenla kidang sabang nungi sayutsüngi mesüteti aru.

Taküm January ita nung Grace Community Church nung deacon, Tom Patton-i Arogo nung züngsemtem dang, arrshi küm 85 MacArthur temang nung timtem aika adokba ajanga Tenla kidang sabang nungi shilem magiteter; 2024 küm tesadang nungi tenzüka pa surgery asemben tashi agiogo, ta metetdakja liasü.

"Pa temang imlaba ama kera shia marur, aser mapang shia pa temelungjang, tepokpok aser tezüngjang nung timtem adoker. Temang nung timtem balala adokba teraji doctor temi meputeter," ta paisa metetdakja liasü.

Taküm küm tetenzüklen Grace Community Church nung ayongzükba Shepherds Conference nung MacArthur-i Tsüngrem O jembia liasü. Iba mapang nungjia pai, "Kü arrshi tatembanglen ka dangi arudar, ta ni metetogo," ta metetdakja liasü.

"Taküm milen aseptsü mapang atonger, ta nai kodang metetdir tetezü tasen ka meteter. Tsüngremi kü taküm amshiba atema ni Tsüngrem nem tenünsang agütsür aser küm aika tenzüka wadang nung alidang Pa O ajanga Pai inyaktetba mapatem atema pelar," ta pai metetdakja liasü.

ANOGO ABEN TSÜNGREM DEN

Tenünsang agütsütarma ?

Saka ayatrem nung Paul aser Silai Tsüngrem dang sarasadema aser ken tena liasü, aser tsüngden chiokdak alirtemi parok o angaa liasü. (T. Mapa 16:25)

Kodang Paul aser Silai Filipi nung sayutsüngi ao, alatsür shiba dak temenen tanela liasü aser shibai ainkar mapa agi la kibur nem tajangzük jenti bener arutsür, la ajurua la dak nungi temenen tanela aritoktsü. La kiburi parnok tajangzuk angutsü mali ta aji-tet nung Paul aser Silai apu aser parnok anema küli agütsür zuka tsüngden chiokdak ayu. Zübu bener idakji alidang ayatrem nung Tsüngrem dang sarasadema ken aten. Parnoki kechi tia ajuru iba jagi parnok dak aliba tepela koba Tsüngrem nungi aru ibaji remseptsü makok.

Asen taküm nung tia balala ajurua aor saka kecha agia ne dak aliba tepelaji sota tuyudaktsü. Alima maparen ken dang lir sama aotsü mapatem nungji ne tepela teperi akümtsü temerang. Chichiba tepelaji alima nungi masü saka Tsüngrem nungi lir. Pa ne dak aliba aser na Pa den telongjem akaba ajanga atoker. Pa tepela ne dak teti lidakjang. Naro rongnung ai aliba asoshi tenemnem, saka ai rong nung naro alibaji ajiteta tenünsang agüjang.

Maharashtra nung MLA kati jembiba o anema Khristantemi longkak



July 11, 2025 nü Mumbai nung Khristantemi longkak aitdang tangokba noksa nung angur.

Mumbai, July 15, 2025

(Agencies): Maharashtra state tesem balala nungi Khristan meyrjang aika Mumbai nung aliba Azad Maidan nung adenshir BJP MLA, Gopichand Padalkar-i jembiba o anema longkak aitogo.

Tawa MLA Padalkar-i yimsü meyipdaksütsü atema yimtsüngtem semdang pastor tem aser putirtem dak azükertem nem senpet agütsütsü ta sangdonga liasü.

BJP MLA-i jembiba o anema Sakal Christi Samaj-i longkak aitba sentongji ayongzük, aser Khristan organization 20-i ibaji pusema shilem agia liasü.

July 11 nü longkak aitba sentongji anüngdang 12:00 ako nungi nikongdang 6:00 ako tashi agia liasü.

July 17, 2025 nü Sangli (Kupwad) nung torch march sentong ka agiba mapang nung MLA Padalkar-i, yimsü meyipdaksüba Khristan lenirtem dak azükertem nem senpet sen lakh 3 nungi sen lakh 11 tashi agütsütsü, ta sangdonga liasü.

Taoba mapang Bombay Catholic Sabha nung Tir, Raphael D'Souza-i, iba ama tashishitsü o jembiaaka state sorkari ola madoker, ta aitsü.

India yangertsü atema Khristantemi shilem tajung agiba dak sendakba nung D'Souza-i, "Onok ya yimjung meimertem lir, aser onoki shisaliok, healthcare aser lokti tenzüka mapa balala nung shilem tajung agir. Khristantemi kangshia yimsü meyipdaksür, ta tai tongloksüibaji khenyongi tiyazü," ta metetdaksü.

July 11 nü longkak aitba nung shilem agir lenirtem rongnung yimtenren alenirtema aika densema liasü; Congress lenirtem- Bhai Jagtap, Varsha Gaikwad aser Vijay Wadetiwar nunger, NCP lenir Jayant Patil aser Samajwadi Party MLA Abu Azmi nungeria iba sentong nung shilem agia liasü.

Longkak aitertemi tangsa Padalkar MLA nungi anentsütsüla aser Bhartiya Nyaya Sanhita kübok pa anema ken o benoktsüla, ta takhangba agütsü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Terama

(n) tesadang ka (one of two equal)

* Takarsangeri tsük molok terama ka ozü nem agütsü.

Terangrang

(v) temang pungbapungbar, tekara (athletic, light and fast)

* Marbabo kanga terangrang tanur ka lir.

OLONG PAITEP # 7210

1								2		3	
4			5		6						
								7			8
9								10			
11	12		13								
						14					
15						16					

TIPIEN

1. Tzü beshiba aou

- (6)

2. Meshiyonga ao

- (4)

4. Teimba aküm

- (6)

7. Lai nung ainkar ka

- (4)

9. Süngküm lanu

- (4)

10. Tapok

- (4)

11. Kisüng

- (4)

14. Lai nung tanabuba kakat

- (6)

15. Ani ____ zük

- (4)

16. Tepu meyidak

- (6)

LANGTSÜNGLEN

1. Azüzükba shisatsü

- (8)

2. Nemjema bilem

- (4)

3. Tentet

- (4)

5. Temechi

- (4)

6. Kishi den tilaba apaba

- (7)

8. Tekolok-i agütsüba

- (8)

10. Yagi menemer

- (4)

12. Zükolak tzü

- (4)

13. Bangsemo lendok

- (4)

OLONG PAITEP # 7209 TELANGZÜBA

TIPIEN :

1. Chisang, 4. Ait, 7. Odi, 8. Nangri,

10. Angur, 11. Aiben, 17. Teimeim,

18. Tan, 19. Moa, 20. Takdang.

LANGTSÜNGLEN :

2. Indang, 3. Nüngo, 5. Tain, 6. Ana,

9. Ama, 12. Balala, 13. Nao,

14. Sempa, 15. Atem, 16. Ken.

NAI-A YA METETTER MA

Gland Slam nung asaya timtiba koker
aliba asayartem:

	AUSTRALIAN OPEN	FRENCH OPEN	WIMBLEDON	US OPEN	TOTAL
Novak Djokovic	99	101	101	90	391
Roger Federer	103	73	105	89	369
Rafael Nadal	77	112	58	67	314

SPORTING LIFE

Tripura nung smart meter inoktsüba aikati anemer



Tripura Power Minister Ratan Lal Nath-i Hombarnü osangbener den jembidang tangokba noksa ka yangi angur.

Agartala, Chiteni/July 15 (Agencies): Tripura nung smart meter inoktsüba atema

nüburtem temulung masüba tali akümba den opposition party temi anir longkak aiba mapang Power Minister Ratan Lal Nath-i Hombarnü tayongzükba ka agüja, meter tem ya meshidak ta kuli agüjang, ajita mesüra nüburtem tanisa, ta ashi.

"Qualified electrical engineer kati danga smart meter tem nung technical tsütsü aibelen lir ta kuli agüteütetra ni tang iba meter inoka oya aliba ya anendaktsüba dang masü inokatoker alibatema agizükdaktsütsü," ta Nath-i opposition aija ashi.

Ken o dak sendakba nung yimden yimsüsüba tsütsü nüburtemi ola adokba ya aija ashiba agi, "iba ya technical ken o ka lir aser yimden yimsüsüba dak sendaka mali. Nai medical tsütsü shisatsü agitsü atema süngo ayokdak ka dangi maoer; nai doctor den ken o ashishiteper. Kasaji smart

meter dak sendakba nung mongintemi dang jembitsüla."

Nath-isa, consumers temi dang mulungra meter tasen aser tejen naprongla amshitetsü, ta shia parnok dang aibelen kar danga lira lenmang shidak ajanga osang agütsütsü mepeshia metetdaksü. "Certified agency temi meter tem ya tendangogo aser technical standard tem ajak tongtetogo," ta pai ashi.

Smart meter amshiba tajangzük indang jembiba mapang Minsiter-i, electricity agiba tejangjaba metettsü atema smart meters yagi TSECL nem teyari agütsür, transformer upgrade asütsü aser load management atema sentong tajungba yanglutsü teyari agütsür, ta ashi. Paisa, meter tem ya ochishiba consumer tem atema tajangzük ta shia, meter ya angati agi dang inoktsür aser sen crore 603 alang central project kati senotsü teyari agütsür, ta ashi. Ketdangsürtemi state kübok tesem balala nung unit 94,000

dak tema inoktsügo.

Kasa mapang nung Nath-isa, October ita nungi tenzüka infrastructure yanglushitsüba indang metetdaksü, kong Agartala, Khumlung, Dharmanagar, aser Udaipur nung power cable tem ali nung rema aotsüba densema lir, koba ajanga yipur agi kongshiba mapang power mapang shia oadokba nungi jenboa alitsü.

Electricity bills timba akümba indang jembiba mapang pai, iba ya smart meters den sendaka mali ta ashi. "Iba ya ken o balaka. Nisung kari osang tai agüja consumer tem anisatsü meranger," ta pai ashi.

Ajisüaka nüburtem temulung masüba kanga lir. Kibong aikati electricity bill taoksatsüka aika aruba indang social media ajanga lemsatepogo.

Khowai district nung retired employee Pramesh Bhattacharjee indang bill ita ka atema sen 31,000 dak tema aruba agi pa aoksaba lemsatepogo. Ano Ashok Das Ray-ia bill sen 82,500 agizüka liasü.

Congress, CPI(M), aser Trinamool Congress densema opposition party temi Tripura State Electricity Corporation Limited (TSECL) office kima longkak aitba sentong ayongzüka agiogo. Parnoki smart meter inoktsüyonga aoya aliba maparen ya tangsa tang anentsü takhangba agütsüba den meter tasen agitsü atema consumer shinga menongshitsüla, ta ashi.

Arunachal nung ILP malir 39 apu



Arunachal Pradesh nung Inner Line Permits (ILPs) makai alir aser mapa inyaker nisung 39 Mongulbarnü apu.

Itanagar, Chiteni/July 15 (Agencies): Arunachal Pradesh nung Inner Line Permits (ILPs), maka alir aser

mapa inyaker 39 puogo, ta ketdangsür kati Mongolbarnü metetdaksü.

Arunachal Pradesh nung masüba India nung ajak iba state-i aitsü aser alitsü atem ILP ya nungdaker.

Banderdewa, Karsingsa, Naharlagun, aser Papu Hills nung meita aoba sentong benoka inyakba mapang item nisungtem ya sota liasü, ta Naharlagun-Itanagar Capital Region Superintendent of Police (SP) Nyelam Nega-i ashi.

Banderdewa, Naharlagun,

asir Papu Hills police station tem nungi police team balalai ayangertem anenzüka aliba tesem, mapa inyakba tesem aser lenmang tezülen establishment balala meita oa liasü.

Aibelenertem ajak sotogo aser temzüng ozüng dak ajemdaker jenjang tapet agitsü atema executive magistrate dangi yokogo, ta SP-isa ashi.

Banderdewa nung Inspector Kipa Hamak-i anir team kati nisung asem anema non-FIR ken o tem benoka liasü. Naharlagun nung Inspector Krishnendu Dev-i anir team kati nisung 30 apu aser Papu Hills police station nungi Inspector

Tarun Mai-i aniba team kati nisung trok pua liasü.

SP-i ashiba agi, meita aoba sentong ya temzüng ozüng dak ajemdaker yimjung nung dang agiogo. Paisa, Arunachal nung masürtem ket nung ILP kechi südir süaka alitsüla aser employer temi iba inyakyim sülen tashi anga anidaktsüla, ta nenshia metetdaksü.

State lisopur masürtem state-i aitba asadanga atatsü aser lisopurtem sobaliba aser maitsü wazüka ayutsü nükjidong nung ILP inyakyim ya benokogo. SP-isa, iba amala mesükba inyakyimtem ya tarutsü nunga maneni benoka inyaktsü, ta metetdaksü.

Ni mepelar saka Putin den ken o metembang: Trump

Washington, Chiteni/July 15 (Agencies): United States Tir Donald Trump-i BBC den phone ajanga jembidang, pa Vladimir Putin dang mepelar ta ashi.

US tir dang, nai Russia lenir dak tamang akar asü makar ta asüngdang aser pai, "Ni nisung shinga daka tamang makar," ta langzü.

Ukraine dangi nok-nü yoktsü sentong tem sangdonga aser anogo 50 tsüngta ceasefire melira Russia dang tariffs kanga sashia meshitsü tekumdangtsü metetdaksür ghonda ishika lir Trump den jembia liasü.

Oval Office nungi osangbener den jembidang, mapang ka tejen kumogo ta ashiba NATO indang common defence principle bhukuma nokdakba indang tiri ashi.

Butler, Pennsylvania nung nübuyimba mapang pa tepsettsü meranger küm ka ajungba nüngtem nung sensaksem akatsü asoshi BBC dang phone call süa minute 20 shi jembia liasü.

Tepsettsü merangba nungi jenboba ajanga pa melenshi asü ta asüngdang dang, Trump-i iba indang akok tashi

mebilemtetner, ta langzü.

NATO chief Mark Rutte den White House nung ajurutepli asünung, pai Russia lenir dang mepelaba indang rasaa ashiba nung mapang talangba indoka liasü.

Ukraine nung rara tembangtsü asoshi Russia den tezüngzüktep yanglutsü südi ta pai mapang balala nung pezüben tashi bilema liasü ta ashi.

BBC ajanga na Putin den ojang asü ta asüngdang dang, "Ni pa dang mepelar, saka ni ano pa den metembang. Saka ni pa dang mepelar," ta tiri langzü.

Trump dang komaser Putin-i azüdokshiba anendaktsütsü ta asüngdang dang, "Onok iba atema inyakteptar," ta US tiri langzü.

"Onok jangratema sensaksemtsü. Tatemleni arur ama bilema alidang pai Kyiv nung ki raksatsütsü."

Russia-i Ukraine yimtitem nung drone aser missile amshia amakba tawa tesashiba kumogo, aser civilian asü-amaba aika lir. Parnoki par kidanger linük nung 2022 küm tetenzüklen nungi tashi ajak amshia amaker.

Putin-ia yimjung aginer ta

shijen shia arur, saka iba rara tenzükba tera ya mezüing angatetteptsüla ta ashir. Ano Kyiv, NATO aser "collective West" nungi Russia indang security nung tebilemtsü agütsüba mechi iba rara ya lir ta ashir.

Sensaksemba ya NATO dangi meyip, koba tejen kumogo ta Trump-i taoba mapang aija liasü.

Pai tangbo NATO yamaji masü amai bilemer, kechiaser alliance ajanga pei bills menoker, ta ashi.

NATO lenirtemi defence tsütsü pei indang economic output shilem 5 indoktsü mulungtepba ya jangratemsü lir, ta Trump-i ashi.

"Ibaji takoktsü ama shingaia bilema meliasü."

Pai tang tashi collective defence nung amanger, kechiaser ibaji ajanga linük tilatemia linük tuluba nungi kumzüka litettsü ta ashi.

Germany, France aser Spain densema linük balala lenirtemi pa aser pai telemtetba agiba akumtsübor, kechiaser alima lenirtemi tir inyaktsü tanaben shimba nung sempet jenti lir südi ta amanger, ta Trump-i ashi.

Trump-i Zelenskyy dang Russia telonglen amaktsü ajungshi

Kyiv, Chiteni/July 15 (Agencies): US Tir Donald Trump-i kibok nung Ukraine Tir Volodymyr Zelenskyy dang Russia linük telung nung amaktsü ajungshi aser US-i agütsüba long-range weapons tem teyari nung Kyiv-i Moscow dak tenük yoker maktettsü asü ta asüngdang, ta osang kar ajanga ashir.

Lenir ana tsüngta iba jembishinü ya July 4 nü agia liasü, koba Trump-i Russia indang rara nung pa tangatetba aser nübuyimba mapang rara tatem kati arudaktsütsü nangzükba nung temelenshi tulu aliba sayur.

Hombarnü Trump-i Russia dang anogo 50 tsüngta Ukraine nung rara tembangtsü ashi aser aji meinyakra rongsenketzüng tsütsü temerenshi tasen aser tulu alitsü ta ashi aser NATO ajanga Kyiv nem nok-nü agütsütsü sentongtema lemsatepa liasü.

Trump-i pa Vladimir Putin dang kangasa mepelar ta ashi aser iba rara tembangtsü Russia leniri memulungba yong pa taremzükbba samaogo ta shia aruba jangjatsür.

"Anogo 50 nung tezüngzüktep ka meyanglutetra onoki tariff tsütsü mera tesashi agitsü, aser noklang shilem tashi meshitsü," ta Trump-i Oval Office nung NATO Secretary General Mark Rutte den senden amenba mapang ashi.

Russia indang trade partners tang anünga alirtem dak tenük yoker secondary tariffs

meshitsü ta Republican lenir ashi - koba Western sanctions jenti liaka Moscow rongsenketzüng tashi ita aliba nung kongshitsü meranger alitsü.

Taoba küm Russia indang top trading partner ya China liasü aser iba sülen India, Turkey aser Belarus, ta Russian Federal Customs Service ajanga ashi.

Trump aser Rutte nati deal ka saya, aser iba tezüngzüktep kübok NATO military alliance ajanga United States nungi Patriot anti-missile batteries densema sen dollar billion aika agi nok-nü alir Ukraine dangi yoktsü.

Kasa mapang Ukraine Ato Kilonser Denys Shmyhal-i pa indang resignation letter agütsüogo ta sangdongogo, anungji Russia-i tanen makai amakba den yimten anibelemer

aliba linük sorkar nung temelenshi tulu tenzüktsü. Ukraine Tir Volodymyr Zelenskyy-i First Deputy Prime Minister Yulia Svyrydenko ya Ukraine indang ato kilonser tasenba asütsü shimer anogo ka lir iba osang ya arur.

Zelenskyy-i taoba mapang Denys Shmyhal ya linük indang Minister of Defence inyaktsü ajungtsü ta shia liasü. "Denys Shmyhal dak tajangshiba jenti aliba ya Ukraine indang Minister of Defence asoshi jenjang tulu alitsü. Aser yangji asen linük indang resources timba, teinyaktsü timba aser mapa timba lir," ta Zelenskyy-i ashi.

Parliament-i agizükra, Denys Shmyhal ya ato kilonser indang defense strategy ketdang asütsü.

Israel-Iran rara mashi mapang tenzüktsü akok

Tehran, Chiteni/July 15 (Agencies): Iran aser Israel tsüngta ceasefire ya jelia tekumdangtsü mesayui tenzüktsü akok, kechiaser taoba ita kanga sashia raraba sülen region nung tensa kangasa mejungi lir, ta Iran nung ozüing yanglur kati ashi.

"Rara metembang, ibai khen atema anena aliba dang lir. Ibai mashi mapang tenzüktsü akok," ta Iranian parliament indang National Security and Foreign Policy Commission züngsem Fadahassein Maleki-i ashi.

Iran mitkartem kanga saksalema aser West den asendenshir tesendaktep mejungi aliba mapang ka nung Fadahassein Maleki-i iba sangdong ya agütsü. Ozüing yanglurisa, snapback sanctions - nuclear non-compliance atema United Nations-i temerenshi agütsüba - tanaben asadangshira, Tehran-i Europe tesendaktep asadangshitsü ta ashi.

Israel-i June 13 nü ajungbena Iranian nuclear aser military infrastructure nung amakba ajanga linük ana

TENÜNGSANG ASER TETUSHI AGÜTSÜR



OFFICE OF THE
MANGMETONG YIMPANG PONGENER KIDONG TELONGJEM KOHIMA
KOHIMA : 797001, NAGALAND

Mr. Chongten Pongener, S/o Dr Imtiwabang Pongener & Mrs. Thungchanbeni Kithan, NSSB 2024 tatidang nung LDA cum computer Assistant (Directorate), Directorate of Science and Technology nung takok tajung ngutetba asoshi Mangmetong Yimpang Pongener Kidong Telongjem, Kohima-i tenüngsang aser tetushi agütsür. Tsüngremi nü mapa nung maneni moajangma.

Sd/-
CHUBAMEREN PONGENER
President, MYPKTK

Sd/-
JAONGCHANG PONGENER
General Secretary, MYPKTK

OFFICE OF THE MERANGKONGTSÜR TELONGJEM TULI

Dist: Mokochung, Nagaland:798618

TENÜNGSANG AGÜTSÜR

Merangkongtsür Telongjem Tuli Unit ajanga Merangkong senso tajung shinokisa wadang balala nung takok tulu anguba ajanga senso sanger nem konang aser tetushi bener arutsüoko nenok ajak dang kanga pelaba lemsateper.

- Kr. Kümsangmenla Imsong**. D/O Lt.Bendangnungba & Wt.Chubainla. Top-7 (History) . Fazl Ali College.Under graduate examination, Nagaland University 2025.
- Kr. Pangersenla**. D/O Lt.Bendangmongba & Wt.Satemmongla. Top-10 (Education) Tuli College,Tuli.Under graduate examination Nagaland University 2025
- Sp. Chubanüksüing Lkr**. S/O Wb.Imsütangit & Mrs.Süngjemrenla. Top-6 (General, BA) Tuli College,Tuli. Under graduate Examination Nagaland University Examination 2025.
- Kr.Odilemla**.D/O Wb.Meyitiba & Wt.Rendinungla. LDA Cum Comp.Asstt.(Directorate)Works &Housing (NPWD) NSSB Exam 2024.

Maneni senso tajung shinokisa pei wadang nung takok ngüogo nenok ajak dang kanga pelaba lemsateper. Tsüngremi nenok taküm maneni pa temoatsu nung aniangma.

Sd/-
President
(**Wt.K. Temsunaro**)

Merangkongtsür Telongjem Tuli

Sd/-
(**Wt.Moamongla**)
Secretary

Merangkongtsür Telongjem Tuli

SANGDONGER

LPG Gas Connection alirtem ajak dangi tongtibang temetettsü ka yamai sangdonger.

Nenok gas card suspend/block mesüi active süa alitsü asoshi iba No. 8454955555 nung itashi (monthly) miss call khenbo agüjangma. Kechiyong suspend/block süatokra lapoktsu kanga tasak. Anungji, customer-temi mamai agüja aliba number nungji itashi miss call agütsütsü nenshia metetdaksür.

Sd/-
Manager
Longkumer Gas Agency,
Mokokchung

tsüngta rara tesashi ka indanga teka aita Iranian tenzükba sülen iba nuclear facilities asem nung tekumdangtsü ya ashi. tayimtsü amshia amak. Iran-i

Israel-i Iran tesem balala tayang kepzüka Qatar nung nung tayimtsü amshia amak aliba US base ka nung missiles aser iba mapang Iran indang khaloktsü aser regional war nuclear tashi aser air defences tesashiba akumtsü tsüboa liasü. US tetsüngtai ia ceasefire kanga sashia raksatsü. Iran-ia telangzüba tesashi agüja ya June 24 nü sangdong. Iba ballistic missiles 550 dak tema rara nung Iran indang nuclear aser explosive drones 1,000 shi sentong, talisa Natanz, Isfahan Israel yimti aser military bases aser Fordow nung ki o jen nung khaloktsü. kanga sashia raksatsü, saka mongin temibo Tehran-i jelia United States-i mezüngbo tongtipang enriched uranium Israel nem defensive support stockpiles ya tesem dangai kisüing agüja liasü, saka anogo belener liasü südi ta ashir. tokunü buba nung indang-

Roony Bardghji Barcelona nung denogo

Chiteni/July 15, 2025 (Agencies): Barcelona-i FC Copenhagen winger Roony Bardghji euro million 2 agi alizükogo, ta club sangdong ka ajanga Hombarnü metetdaksü.

Bardghji, shiba hopta tatem Barcelona-ia oa liasü, pai Deobarnü mezüngbuba par teammate tem den ajurute-pogo aser 2029 küm tashi asayatsü atema tenanzüktepba yangluogo.

Copenhagen den tenanzüktepba yangluba nung performance dak sendakba add-ons densema lir aser iba den ano tarutsü nung Bardghji transfer süra parnok percentage ka angutsü.

Bardghji aser FC Copenhagen na tenanzüktepba yanglur aliba ya December ita tembangtsü liasü, ibayongji parnoki taah ajema agitsü atema mulunga agizükogo.

Arishi küm 19 tain asayar ya Hansi Flick indang first team den preseason nung shilem agitsü aser taruba season pa kong asayatsü aji telemtetba ka magi tsüngda pa iba ita tatem Club Asia nung oa asayatsü aliba nung shilem



agitsü imlar.

Club source kati ashiba agi, Bardghji alizükba ya tarutsü atema dang masü saka pai tanga tongtibang shilem agitetsü, ajisüaka pa Spanish football fourth tier nung club indang reserve team team nungiang asayatsü akok.

Copenhagen nung küm pezü asayaba sülen Roony Bardghji tang Barcelona nung denogo. Osang ajanga ashiba agi, LaLiga club aikati pa loan nung anir aotsü tejangraba aliba lemsatepogo..

Bardghji, shiba Kuwait nung Syria nung kibong ka

nung aso pa Sweden senso ka lir. Pa ya küm ana tejakdang Champions League nung ajaki jangja aküm, saka ACL yiruba ajanga career nung tetsükdaksü adoka liasü.

2023-24 season nung pai goal 11 idaksü kong, Copenhagen puri 4-3 agi Manchester United akokba asaya nunga pai goal idaksüba densema lir. Iba sülen pa 2024 küm May ita yiru.

Ita 10 masayatetba sülen pa taküm March ita nungi asaya tenzükogo aser Danish Superliga nung asaya trok nung asaya liasü.

Jordan Brentford-i Henderson den küm 2 atema tenanzüktepba yangluogo

Chiteni/July 15, 2025 (Agencies): Brentford-i England midfielder aser taoba mapang Liverpool captain Jordan Henderson den küm ana atema tenanzüktepba yangluogo. Henderson-i tawa Ajax tokja liasü.

Arishi küm 35 tain Henderson ya Liverpool nungi küm 12 asaya, kong pai Premier League, Champions League, FA Cup, League Cup ana, Community Shield, Super Cup aser Club World Cup kokogo.

2023 küm July ita pa Saudi Arabian club Al-Ettifaq nung aden, saka ita trok dang lir tenanzüktepba yanglur aliba thija pa Ajax nung oa aden.

Taoba hopta iba Dutch club yagi Henderson den tenanzüktepba yanglur aliba küm ka jelia tembangtsüsü mulunga agizüka liasü.

Henderson ya manager tassenba Thomas Tuchel-i March ita England team nung züngoksema liasü. Pa 2023



küm November ita nungi England team nungi khien danga masayai liasü. Pai tang tashi nung England team nungi 84 ben asayar lir.

Midfield nung asayasang ya World Cup asem aser European Championships asem nung asayaogo.

"Jordan alizüktsü atema maongka aliba indang meteta aruba sülen onok atema telemtetba agitsü temela liasü," ta Brentford manager Keith Andrews-i ashi.

"Pa tang tashi kanga fit lir aser iba asaya nung takok aika ngur liaka maneni takok tajung angutsü tejangraba lir," ta paisa shisem.

Tawa Christian Norgaard, Mark Flekken aser Ben Mee nungeri club toktsüba sülen tajangshiba aika bener aliba asayar ka agi parok melentsü nüngdaka liasü, ta Andrews-i ashi.

"Jordan ya tawa Premier League asaya nung lenirtem rongnung tajungtiba rongnung ka lir. Pa ya club tajung ka nung title balala aser Champions League atema nongshia asayaba mapang tejakdang sür shilem agia liasü," ta Andrews-i ashi.

"Pa standards ajungkettsüsü aser pa ya squad nung tongtibang asayar ka asütsü," ta paisa shisem.

Maharaja Trophy T20 auction nung Padikkal sen tasaktiba agi ayok

Chiteni/July 15, 2025 (Agencies): 4buba Shriram Capital Maharaja Trophy KSCA T20 auction nung Devdutt Padikkal sen tasaktiba agi alizükogo. Pa Hubli Tigers puri sen lakh 13.20 agi alizüka liasü.

Pa sülen tanabuba jenjang nung Abhinav Manohar aser Manish Pandey na liasü. Tena ya Hubli Tigers aser Mysuru Warriors nati sen lakh 12.20 agi alizüka liasü.

Bowler tem rongnung Shivamogga Lions puri pacer Vidwath Kaverappa sen lakh 10.80 agi alizük aser Bengaluru Blasters puri strike bowler Vidyadhar Patil sen lakh 8.30 agi alizüka liasü. Auction mapang Mysuru Warriors puri all-rounder tem dak rangloker bid asü aser parnoki K

Gowtham sen lakh 4.40 aser Yashovardhan Parantap lakh 2 agi alizükogo. Warriors purisa taoba season wicket timtiba agiba asayar Kumar LR sen lakh 1.50 agi, left-arm spinner Shikhar Shetty sen lakh 4.70 agi, pacer Venkatesh M sen lakh 2 agi aser Gowtham Mishra

sen lakh 2.25 agi alizükogo. Parnokisa top order tashi itshidakja wicketkeeper-batter

Harshil Dharmani sen lakh 3.20 agi alizükogo.

Bengaluru Blasters puri auction milongi tenzük aser Category A nung kanga danga malizük. parnoki Chethan LR atema mezüngbuba jenjang agi aser sen lakh 5.10 agi alizüka liasü.

Maneni parnoki strike bowler Vidyadhar Patil sen lakh 8.30 agi alizük. Batting unit tashi itshidaktsüsü atema parnoki Rohan Patil sen lakh 2.70 agi alizük aser spin atema Rohan Naveen sen lakh 4.25 agi alizük aser iba sülen arishi küm 16 tain Madhav Prakash Bajaj sen lakh 3.15 agi alizüka liasü.

Iba asayamung atema Hubli Tigers, Gulbarga Mystics, Mangaluru Dragons, Mysore Warriors, Shivamogga Lions nungeria asayar tajungtem aika alizükogo aser taküm iba asayamung tanga mapang dang nungi jangratatema asayatsü imla atar.

India den Test 4buba atema Liam Dawson shimogo

Chiteni/July 15, 2025 (Agencies): India den Old Trafford nung Test pezübuba atema spinner Liam Dawson England squad nung züngoksemogo. Pa küm ti lir tang mezüngbuba Test asayatsü lir.

Arishi küm 35 tain left-armer Dawson ya off-spinner Shoaib Bashir melen shimogo, shiba temeyong yiruba sülen iba asayamung nung tanungba asayatem nung masayatetsüsa kümogo.

Dawson shimba tetezü külem left-armer Jack Leach züngtokogo, shiba nem England central contract agütsür lir.

Leach ya taoba küm Bashir-i England indang first-choice spinner ama melen, saka pa Pakistan den Tests asem asayaogo aser New Zealand nung oa asayaba team nunga pa densema liasü.

Dawson kanga meranga asayarang tang team nung züngoksemogo. Pa domestic cricket nung kanga junga asayaba ajanga shimogo. Hampshire nungi asayasang ya taoba season ana tashi Professional Cricketers' Association player of the year liasü.

Pa 2019 World Cup akokba England team nung densema liasü, saka küm asem tashi pa team nung manioki aruba sülen taküm lemluwa West Indies den T20 asayamung atema pa team nung züngoksema liasü.

Test pezübuba atema England team:

Ben Stokes, Ben Duckett, Zak Crawley, Ollie Pope, Joe Root, Harry Brook, Jamie Smith, Jacob Bethell, Liam Dawson, Gus Atkinson, Chris Woakes, Jofra Archer, Josh Tongue, Brydon Carse.

BILEMDANGANG

"Nüsasa melenshitsü memulungtetra memelenshitetsü."